

欽
定
全
唐
文

欽定全唐文卷七百七十九目錄

李商隱 九

爲滎陽公桂管補逐要等官牒

爲大夫博陵公充海署盧鄴巡官牒

爲潼關鎮使張瑄補後院都知兵馬使兼押衙牒

陳寧攝公井令牒

周宇爲大足令牒

爲濮陽公檄劉稹文

太尉衛公會昌一品集序

容州經略使元結文集後序

樊南甲集序

樊南乙集序

太倉箴

劍州重陽亭銘

并序

梓州道興觀碑銘

并序

欽定全唐文卷七百七十九

李商隱

九

爲滎陽公桂管補逐要等官牒

田仲方

右件官掌予書計積爾光陰臨文乃辨於魯魚問數能知
於身首昨者始從藩寄初啟戎行有廊廡所散之金有筐
筐是將之帛資其出納益見廉隅不惟錄舊之誠且切隨
材之用事須補充逐要

嚴君景

金定公集卷之二十一
右件官當參戎府洎從廉車殿後驅前拉朽穿蠹旣展在
公之績宜當職祿之科聊比秩於中璋用承榮於建旆事
須補充同兵馬使

王公衡

右件官素樂從軍少來歸我勁勇而敢探雛虎誠明而可
涉呂梁屢變星灰益彰冰蘖今兵屯越嶠播控蠻圻無淮
陰市井之人有秦伯紀綱之僕是焉求舊以壯中權宜思
干命之刑用保克終之美事須補充某營十將

劉淮

牒奉處分我之上軍實首南服靜則拔距投石用養其威
動則振鐸挺鍵以揚其武爰求訓整是屬偏裨前件官頗
厯星霜爲予御右望通軍志誓在戎行是用挾以楚轅分
之齊鼓勉思脫兔勿暴將羊事須補充某營十將

徐適

右件官嘗從州兵實懷戎略瞻晉卿之馬首識齊壘之烏
聲使以履軍冀無堅敵屬熊湘南戍於越北疆思揚建隼
之威用警跼鷺之俗爾其撫予後勁聽我先庚深宏戰器
之資用叶師貞之美事須補充某營十將

鄭楚

牒奉處分爾之嚴君頃於冢宰守無假器行不易方慶襲
身枝名登尺籍是用分乘楚廣均領晉藩刻思及父之賢
以奉丈人之吉事須補充同十將

李邯

右件官族傳隴右氣蓋關中藏蒙瑜獨出之鋒蘊頗羽先
登之志今者疆分楚越俗雜蠻夷資中江下瀨之師鎮祝
髮鏤膚之俗無替爾勇挫我軍威事須補充討擊副使

張存

右件官早輸丹赤頗涉星霜雖懷暴武之鋒不起戡彈之色唯茲沈毅可使訓齊今則登以五符列之三鼓爾其聿修戰器精講軍書勉膺擊刺之名用獎勤劬之節事須補充討擊副使

王政

右件官一心事我三歲食貧奉崔瑗之嘉賓曾無情色收陳遵之尺牘不失片辭旣愿慤以可規亦聖明而有守宜攜刀筆從我牙旗事須補充要籍

劉公實

右件官早在戎藩素推武藝堇父敢登於懸布養由無失
於穿楊屬徼外無虞軍前罷警且從散秩勿慮遺才事須
補充散將

鄭琬

右件官嘗在壯圖亦從薄宦解康成之書帶精鬼谷之鈴
經不殫遐方忽茲投迹雖云小國寧忘亢宗將有俟於先
勞固未登於真守事須補充同散使

爲大夫博陵公充海署盧鄴巡官牒

判官地實清門人稱端士和以接物謙而飾躬自贊藩條

蓋推賓彥幸今休邏無惜辱臨事須請攝觀察巡官

為潼關鎮使張瑄補後院都知兵馬使兼押衙牒
右件官質茂松筠誠高金石謙能養勇義實輕生頃分職
近關別屯要地時奮猿臂誓探虎雛既守禦而有經諒追
奔之可犯况又秦中共事海內相從酬知能誓於始終于
役不辭其暴露脂車秣馬昔嘗為我以前驅被甲執兵今
合撫予之後勁仍榮心膺兼總牙璋事須補充押衙

陳寧攝公井令牒

聞寧前為公井令疲羸之眊戴之如父母囊橐之盜畏之

猶神明所謂伊人何臻此術還臨舊部勉繼前修

周宇爲大足令牒

宇君子人也詩家者流常亦觀光厄於時命噫有卓魯之
政事與顏謝之篇章較其爲名不相上下無謂大足小而
辭之

爲濮陽公檄劉稹文

足下前以肺肝布諸簡素仰承復命猶事枝辭夫豈告者
之不忠抑乃聽之而未審擇福莫若重擇禍莫若輕一去
不廻者良時一失不復者機事噫嘻執事誰與爲謀延首

北風心焉如灼是以再陳禍福用釋危疑言不避煩理在
易了丁寧懇款至於再三者誠以某與先太傅相國俱沐
天光並爲藩后昔云與國今則親鄰而大年不登同盟未
至飯貝纔畢襚衣莫陳乃睠後生遽乖先訓遷延朝命迷
失臣職不思先穀之忠將覆藥書之族此僕隸之所共惜
兒女之所同悲况某擁節臨戎援旗誓衆封疆甚邇音旨
猶存忍欲賣之以爲已功間之以開戎役將祛未寤欲罷
不能願思苦口之言以定束身之計昔先太尉相公常蹈
亂邦不從逆命翻身歸國全家受封居韓之西爲國之屏

棄代之際人情帖然太傅相公以早副軍牙久從征旆事
君之節已著居喪之禮又彰故乃獎其象賢仍以舊服納
職貢賦五十餘年於我唐爲忠臣於劉氏爲孝子人之不
幸天亦難忱纔加壯室之年奄有壞梁之歎主上深固義
烈是降優恩蓋將顯足下之門爲列藩之式不欲劉氏有
自立之帥上黨爲辜恩之軍俾之還朝以聽後命其義甚
著其恩莫偕昨者秘不發喪已逾一月安而拒詔又厯數
旬秘喪則於孝子未聞拒詔則於忠臣已失失忠於國失
孝於家望此用人由茲保族是亦坐薪言泰巢幕云安智

士之所寒心謀夫之所齮舌矧於僕者得不動心竊計足下之懷執事之論當以趙氏傳子魏氏襲侯欲以逡巡希恩顧望謀立耳夫事殊者趣異勢別者跡睽故度其始而議其終舉其華而尋其實願爲足下一一而陳之夫趙魏二侯於其先也親則父子於其人也職則副戎賞罰得以相參恩威得以相抗義顯事順故朝廷推而與之今足下之于太傅也地則相近職非副戎賞罰未嘗相參恩威未嘗相抗秘喪則于義爽拒詔則於事乖比趙魏二侯信事殊而勢別矣此施之於太傅趙魏則爲繼代象賢之美施

之於足下足下則爲自立擅命之尤得失之間其理甚白
又計足下未必不恃太傅之好賢下士重義輕財吳國之
錢往往而有梁園之客比比而來將倚以爲牆藩託以爲
羽翼使之謀取使之數求細而思之此又非計山高則祈
羊自至泉深則沈玉自來已立然後人歸身正然後士附
語有之曰政亂則勇者不爲鬪德薄則賢者不爲謀故吳
淠有姦而鄒陽去燕噲無德而樂生奔晉寵大夫卒成分
國之禍衛多君子孰救渡河之裁此之前車得不深鏡代
憲四祖文明繼興當時燕趙中山淮陽齊魯連結者幾姓

旅拒者幾侯咸逆天用人背惠忘德據指掌之地謂可逃
刑倚親戚之私謂能取信一旦地空家破首裂支分閭者
不能爲謀明者固以先去悔而莫及末如之何先太尉與
李洧尚書齊之密戚楊太保與蘇肇給事蔡之懿親並據
要地方州領精甲銳卒及其王師戾止我武維揚則割地
驅人以降送款輸忠以入非不顧密戚非不念懿親非不
思恩非不懷惠直以逆順是逼死生實難能與其同休不
能與其共戚故也況足下大未侔齊蔡久未及李吳將以
其人動於不義僕恐風沙之國縛主之卒重生彭寵之家

不義之侯更出又計足下當恃太行九折之險部內數州之饒兵士尚強倉儲且足謂得支久謀而使安危哉此心自棄何速昔李抱真相國用彼州之人破朱滔於燕困田悅於魏連兵轉戰縣歲經時而潞人子死不敢悲夫死不敢哭何者李相國奉討逆之命爲勤王之師義著而誠順故也及盧從史釋喪就位賣降冀功將乘討伐之時欲肆凶邪之性計未就而人神已怒事未立而兵衆已離以萬夫之長困一卒之手驅檻北闕棄尸南荒而潞之人猶老者捫臂少者扼腕謂朝廷不卽顯戮深爲失刑其故何哉

以從史不義不暱去安就危衆黜其謀下不爲用故也二
帥去就非因傳聞鳩杖之人鮐背之叟知其本末尚能言
之則太行之險固不爲悖者之守數州之衆固不爲邪者
之徒此又不足恃也由此言之則以何名隳家聲何事捨
君命何道求死士何計得人心此僕者所以對案忘餐推
枕不寢爲足下惜爲足下危而不知其所以然也况太傅
比者養牛添卒畜馬訓兵旁招武幹之材中舉將軍之令
然而聽於遠近頗有是非雖朝廷推赤心宏大度然而不
逞者已有乖異之說橫議者屢興悖惡之歎人之多言亦

可畏也誰爲來者宜其弭之今足下背季父引進之恩失大朝文誥之令則是實先太傅之浮議彰昭義軍之有謀爲人姪則致叔父於不忠爲人孫則敗乃祖於無後亦何以對燕趙之士見齊魯之人耶又計足下旬日之前造次爲慮今茲追改懼有後艱此左右者不明而咨詢之未盡也近者李尚書祐董常侍重華之輩並親爲賊將拒我官軍納質於匪人效用於戎首久乃來復尚蒙殊恩皆受郡符咸領旗鼓不能悉數厥徒實繁豈有足下藉兩代之餘資委數萬之舊旅俛首聽命舉宗效誠則朝廷又豈以一

日之稽遲片辭之疑異而致足下于不測沮足下於後至
故事具存可以明驗幸請自求多福無辱前人護龍旄以
歸洛師秉象笏而朝魏闕必當勲庸繼代富貴通身無爲
鄰道所資使作他人之福倘尚淹歸款未整來軒戎臣鼓
勇以爭先天子赫斯而降怒金珙一受牙璋四馳魏衛壓
其東南晉趙出其西北拔距投石者數逾萬計科頭戟手
者動以千羣兼驅扼虎之材官仍率射鵬之都督感義則
日月能駐抑憤則沙石可吞使兵用火焚城將水灌魏趣
邢郡趙出洛州分二大都之間是古平原之地車甲盡輸

於此境糗糧反聚於他人恃河北而河北無儲倚山東而山東不守以數州之殘殍抗百道之奇兵比累卵而未危寄孤根於何所則老夫不佞亦有志焉願驅敢死之徒以從諸侯之末下飛狐之口入天井之關巨浪難防長飈易扇此際必當驚地底之鼓角駭樓上之梯衝喪貝躋陵飛走之期既絕投戈散地灰釘之望斯窮自然麾下平生盡忘舊愛帳中親信卽起他謀辱先祖之神靈爲明時之哂笑靜言其漸良以驚魂今故再遣使車重申丹素惟鑒前代之成敗訪厯事之賓僚思反道敗德之難念順令畏威

之易時以吉日蹈茲坦途勿餒劉氏之魂勿汙潞人之俗
封帛增歆含毫益酸延望還章用以上表成敗之舉慎惟
圖之不宣河陽三城節度使王茂元頓首

太尉衛公會昌一品集序

唐葉十五帝謚昭肅始以太弟茂對天休遂臨西宮入高
廟將以準則九土指麾三靈乃顧左右曰我祖宗並建豪
英範圍古昔史卜宵夢震嗟不寧是用能文惟睿掌武以
永大業今朕奉承天命顯登乃辟庸不知帝賚朕者其誰
氏子焉左右惕兢威靈迷撓章指周訥揚吃不能仰酬旣

三四日乃詔曰淮海伯父汝來輔予霞披霧銷六合快望
四月某日入覲是月某日登庸淵角竒姿山庭異表爲九
流之華蓋作百度之司南帝由是盡付元機允厭神度左
右者咸不知其夢邪卜邪金門朝罷玉殿宴餘獨銜日光
靜與天語帝亦幽闡徵召誥說命之旨定元首股肱之契
曰我將俾爾以大手筆居第一功麒麟閣中霍光且圖於
勲伐元洲苑上魏收別議於文章光映前修允兼具美我
意屬此爾無讓焉公拜稽首曰臣某何敢以當之在昔太
宗有臣曰師古曰文本高宗有臣曰嶠曰融元宗有臣曰

說曰瓌代宗有臣曰衮至於憲祖則有臣禰廟曰忠公並
稟太白以傳精神納非煙而敷藻思才可以淺深魏邴道
可以升降伊臯而又富僧孺之新事識庾持之奇字清風
濯熱白雪生春淮南王食時之工裴子野昧爽之獻疑王
粲之夙構無禰衡之加點然後可以宏宣王畧輝潤天文
豈伊乏賢可纂舊服帝又曰舜何人也回何人也朕思丕
承汝勉善繼無忝乎爾之先公復拜稽首曰易曰中心願
也詩曰何日忘之臣敢不夙夜在公以揚宏烈會一日上
明發於法宮之中念兆人之衆顧九州之廣永懷不待之

痛式重如存之敬公伏奏曰惟先后懋守丕基允資內助
秀南頓嘉禾之瑞開烈山神井之祥德駕河洲淑肩沙麓
將顯降媯之配未宏褒紀之恩渝美椒塗掩華蘭掖緣山
破彷彿聞齊主之悲採石傳形早降漢皇之慟今繞樞有
慶鳴社承輝而懿號未彰貞魂莫祔恐無以懋遵聖緒光
慰孝思公於是承命有宣懿祔廟之制初文宗皇帝思宗
社之靈祧祖之重傳於夏啟既不克終歸於與夷又未能
立乃推帝堯敦敘九族之道宏魏文榮樂諸弟之志常曰
頽邱吾寧忘邪及武宗讓踰三四位當九五出潛離隱躍

泉在天揚八彩於堯眉挺二肘於湯臂故外則上公列辟
內則常侍貴人咸願擬議形容依稀彩飾公搢圭歸美吮
墨搗詞詠日月之光華知天者之事也贊乾坤之易簡作
易者之事乎公於是有聖容之贊天寶季年物豐時泰骨
體者慕周偃武肉食者效晉清談豕不獷牙蠆因搖尾氛
興燕易駕狩巴梁九十年鑾輅不東三千里華戎遂隔日
者上元降鑒元聖恢奇遂於首亂之邦先有納忠之帥復
我疆理平我讐仇負羽蒙輪已聞於深入赤第邪幅將事
於駿奔陳萬賄以展儀備四旂而告捷仍願於箕星之分

金匱要略卷之二十一
巫閭之旁追琢貞珉彰灼來葉以文上請屬意宗臣公乃
更夢江毫重吞羅鳥町疇河濟呼嘯神祇述列聖之英猷
答藩維之深懇既事包理亂思屬安危不惟嵩岳降神固
亦文星助彩螭蟠龜戴蟲篆鳥章構思而君苗硯焚灑翰
而元常筆閣公於是有幽州紀聖功之碑天街之北獮鬻
攸居結以闕氏降我皇女奉春君婁敬嘗爲遠使下杜人
楊望長作畫工乘以無年遂忘舊好分偵邏於旣脫遣祭
酹於蹕林俾我刁斗晨驚兜零夜設公乃上資宸斷旁耀
軍謀心作靈臺手爲天馬充國四夷之學此日方知薛公

三策之徵他時未爽旣而鬼籍飛辨邳石降籌不使郭閔
仍讒於段熲寧教李邑更毀於班超勢協聲同火燭水灌
遂得朝還貴主暮遁名王轄柳塞之歸車復梅妝而向闕
及晉城赤狄喪帥歸珪有闕伯之弟兄誕景升之兒子將
憑蜀閣欲恃吳錢姑務連雞靡思縛虎旣垂文誥尚有羣
疑公乃挺身而進曰重耳在喪不聞利父衛朔受貶祇以
拒君今天井雄藩金橋故地跨揺河北脅倚山東豈可使
明皇舊宮坐爲汙俗文宗外相行有匪人忠謀旣陳上意
旋定俄又埃昏晉水霧塞唐郊殊懿公之東徙渡河若紀

侯之大去其國稽於時議憚在宿兵公又揚笏而言曰彼地則義師帥惟宗室乃元王勤商之邑后稷造周之邦瓜瓞具存堂構斯在苟虧策畫不襲仇讐則是獎夙沙縛主之風長冒頓射親之俗昔武安君用鉞坑卒四十一萬齊桓公受胙立功一十二國今真將軍爲時而出賢諸侯代不乏人況其俗產代地之名駒富管涔之良璞有抱樹辭榮之節有漆身報德之風邪躡足以謀屈指而定謝安之圍碁尚刼曹參之飲酒正酣適有軍書果聞戎捷牛邯謝衆丕豹出奔樂毅不歸鄒陽已去砥磨周鉞水淬鄭刀萬

里來袁尚之頭顱二冢葬蚩尤之肩髀何其纂立大效樹
建嘉績若是之速與宗英可汗旣畏王威遂聞請吏留犁
徑路對潼酪以知羞毳幕氎裘望衣冠而有慕大畢伯士
之允呼韓單于之師或執玉而朝靈囿或解辮而拜甘泉
並垂於冊書光彼明命百王共貫三代同規公於是奉命
有討北狄之詔伐上黨之制諭回鶻之命五慰堅昆之書
四每牙管旣拔芝泥將乾上輒曰爾有獨斷朕無疑謀固
俟沃心可不假手公亦分陰可就落簡如飛故每有急宣
關於密畫內庭外制皆不與聞此又豈可與美洞簫而諷

於後庭聞子虛而嗟不同世者論功而校德邪其有勢切疾雷機難終日屬宣室未召武帳不開公莫暇昌言且陳密疏賈太傅之憂國固動深誠山吏部之論兵詎因夙習凡所奏御罕或依違及武宗下武重光崇名再易公又觀圖東序按牒西崑率億兆歸心列公卿定議以一十四字垂百千萬年藻縟辭華鋪舒名實秦晉於玉檢瑤繩之內平勃於綠疇讒鼎之間方將命禮官召儒者訪匡衡后土之議採公玉明堂之圖考肆覲之禮於梁生取封禪之書於犬子盡皇王之盛事極臣子之殊功而軒鼎將成禹書

就掩然猶進先嘗之藥獻高手之醫藏周旦請代之書追
漢宣易名之義作爲大誥祈於昊天始終一朝紹續九德
其功伐也既如彼其制作也又如此故合詔誥奏議碑贊
等凡一帙一十五卷輒署曰會昌一品集云紀年追聖德
也書位旌官業也不言制集崇論道也惟公字文饒姓李
氏趙郡人蓋大昴中邱有風雨翕張之氣藁臺高邑有山
河隱軫之靈萃於直躬慶是全德許靖廊廟之器黃憲師
表之姿何晏神仙叔夜龍鳳宋玉閒麗王衍白皙馬援之
眉宇盧植之音聲此其妙水鏡而爲言託丹青而爲裕至

於好禮不倦用和爲貴敬一人而取悅謙三位而無咎意以默識確乎寡辭車匠胡奴罔迷於半面背碑覆局無俟於專心聿成儉訓不有長物昔猶卑官端坐心齋江革分謝朓之舊襦便爲卧具周正得袁憲之談柄常在講筵五車自娛三篋能識麗則孔門之賦清新鄴下之詩重以多能推於小學王子敬之隸法道媚皇休明之草勢沉著異時相逼當代罕儔不妄過人慎於取友與李杜齊名者少願僑札交貺者稀故能應是昌時媚於天子憲章皇極燮理元穹燭耀家聲粉飾國史侔帝典之灝灝噩噩尊王道

之蕩蕩平平而又不節怨嗟知進憂亢張良竟稱多病王
充方務頤神無賴陽之善田乏好時之巨產何曾之食既
去虞棕之鮓方嘗憂其厚味有爽和氣肴藪無在琴鶴有
餘成萬古之良相爲一代之高士繫爾來者景山仰之某
昔在左曹每事先帝雖詭詞望利不接於話言而深義約
文庶歸於風采代天之言旣集蟠地之樂難忘蓋屬才華
用爲序引以鄒衍之迂怪將賴嚴之淺近忽焉承命何所
措辭五嶺幽遐八桂森爽莫逢博約寧遇切磋處無價之
場率然占玉登不枯之岸麤爾論珠雖常有意焉亦不知

量也某叩頭再拜上

容州經略使元結文集後序

次山有文編有詩集有元子三書皆自爲之序次山見舉於弱夫蘇氏始有名見取於公浚楊公始得進士第見憎於第五琦元載故其將兵不得授作官不至達母老不得盡其養母喪不得終其哀間二十年其文危苦激切悲憂酸傷於性命之際自占心經已下若干篇是外曾孫遼東李憚辭收得之聚爲元文後編次山之作其縣遠長大以自然爲祖元氣爲根變化移易之太虛無狀大賁無色寒

暑攸出鬼神有職南斗北斗東龍西虎方嚮物色歛何從
生啞鐘復鳴黃雉變雄山相朝捧水信潮汐若大壓然不
覺其興若大醉然不覺其醒其疾怒急擊快利勁果出行
萬里不見其敵高歌酣顏入飲於朝斷章摘句如娠始生
狼子豹孫競於跳走翦餘斬殘程露血脈其詳緩柔潤壓
抑趨儒如以一國買人一笑如以萬世換人一朝重屋深
宮但見其脊牽緯長河不知其載死而更生夜而更明衣
裳鐘石雅在官藏其正聽嚴毅不滓不濁如坐正人照彼
佞者子從其翁婦從其姑豎麾爲門懸木爲牙張蓋乘車

屹不敢入將刑斷死帝不得赦其碎細分擘切截纖顥如
墜地碎若大咽餘鋸取朽蠹櫟鱗出毒刺眼楚齒不見可
視顥顥踣錯雜汙瀝傷損如在危處如在夢中其總旨會
源條綱正目若國大治若年大熟若君君堯舜人人義皇
上之視下不知有尊下之望上不知有篡竊頭鑿齒扶服
臣僕融風彩露飄零委落耄老者在童齒者蕃邪人佞夫
指之觸之薰薰熙熙不識其故吁不得盡其極也而論者
徒曰次山不師孔氏爲非嗚呼孔氏於道德仁義外有何
物百千萬年聖賢相隨於塗中耳次山之書曰三皇用真

而恥聖五帝用聖而恥明三王用明而恥察嗟嗟此書可
以無乎孔氏固聖矣次山安在其必師之邪

樊南甲集序

樊南生十六能著才論聖論以古文出諸公間後聯爲鄆
相國華太守所憐居門下時敕定奏記始通今體後又兩
爲秘省房中官恣展古集往往咽噎於任范徐庾之間有
請作文或時得好對切事聲勢物景哀上浮壯能感動人
十年京師寒且餓人或目曰韓文杜詩彭陽章檄樊南窮
凍人或知之仲弟聖僕特善古文居會昌中進士爲第一

二常表以今體規我而未爲能休大中元年被奏入嶺當
表記所爲亦多冬如南郡舟中忽復括其所藏火燹墨汗
半有墜落因削筆衡山洗硯湘江以類相等色得四百三
十三件作二十卷喚曰樊南四六四六之名六博格五四
數六甲之取也未足矜十月十二日夜月明序

樊南乙集序

余爲桂林從事日嘗使南郡舟中序所爲四六作二十編
明年正月自南郡歸二月府貶選爲監厓尉與班縣令武
公劉官人同見尹尹卽留假叅軍事專章奏屬天子事邊

康季榮首得七關數月李玘得秦州月餘朱叔明又得長樂州而益丞相亦尋取維州聯爲章賀時同寮有京兆韋觀文河南房魯樂安孫朴京兆韋嶠天水趙璜長樂馮顥彭城劉允章是數輩者皆能文字每著一篇則取本去是歲葬牛太尉天下設祭者百數他日尹言吾太尉之薨有杜司勳之誌與子之奠文二事爲不朽十月尚書范陽公以徐戎凶悍節度闕判官奏入幕故事軍中移檄牒刺皆不關決記室判官專掌之其關記室者記室假故余亦參雜應用明年府薨選爲博士在國子監太學始主事講經

申誦古道教太學生爲文章七月尚書河東公守蜀東川
奏爲記室十月得見吳郡張黯見代改判上軍時公始陳
兵新作教場閱數軍實判官務檢舉條理不暇筆硯明年
記室請如京師復攝其事自桂林至是所爲已五六百篇
其間可取者四百而已三年以來喪失家道平居忽忽不
樂始尅意事佛方願打鐘掃地爲清涼山行者於文墨意
緒濶略爲置大牛篋塗追破裂不復條貫十月宏農楊本
勝始來軍中本勝賢而文尤樂收聚賤刺因懇索其素所
有會前四六置京師不可取者乃強聯桂林至是所可取

者以時以類亦爲二十編名之曰四六乙此事非平生所
尊尚應求備卒不足以爲名直欲以塞本勝多愛我之意
遂書其首是夕大中七年十一月十日夜火盡燈暗前無
鬼鳥一如大中元年十月十二日夜時書罷永明不成寐

太倉箴

險哉太倉險若太行彼懸車束馬爲陟高岡此禍胎怨府
起自斗量無小無大不可不防澄波萬頃不廢汪汪火烈
人畏不廢剛腸曷若寬猛處於中央泉穀之地勿言容易
貪夫徇財有死無二御黠馬銜不得不利下或諛吾過人

之聰是人甘言將欲相聾下或誇我秋毫必睹是人甘言
將欲相瞽長如欲戰莫捨強弩長如獲禽莫忘縛虎衆人
之言有訛有真如彼五味有甘有辛口自嘗取無信他人
天生五色有白有黑目自別取無爲人惑而况乎九門崇
崇近在牆東天視天聽惟明惟聰問龠合斗斛何以用銅
取寒暑暴露不改其容亦象君子介然居中終日戰慄猶
懼或失銜用何利鍛之以清虎用何縛按之以明弩用何
射發之以誠俾後來居上無由以生有餘不足無由以爭
心爲準槩何憂乎不直不平各敬爾職一乃心力倉中水

外人馬勿食陶母反魚以之歎息豈無他粟豈無他芻意
茲似珠不可不虞倉中役夫千逕萬塗桀黠爲炭睢盱爲
鑪應事成象無有定模緣私指使慎勿以呼賓朋姻婭或
來讌話食中酒醴慎勿以貲海翁無機鷗故不飛海翁易
慮鷗乃飛去是以聖人從微至著不遺忠恕借借貲貲此
門先塞須防蒼蠅變白作黑嗚呼熟慮熟圖昔在漢家倉
令淳于致令少女上訴無辜陷身致是不亦悲乎敢告君
子身可殺道不可渝

劍州重陽亭銘

并序

陪臣未嘗屢覩天子宫闕矧得舞殿陛下耶然下國伏地
讀甲乙丙丁詔書亦有以識天子理意尺度堯舜不差毫
撮於絕遠人意尤在不然者安得用江陵令使上水六千

里挽大小虎牙灑瀨黃牛險以治普安

闕一字

今旣爲侯講

天子意三年大理田訟斷休市賈平獄戶屈膝落民不識

胥吏四方賓頗來繫馬靡牛

闕一字

樹膚不生乃大鏟險道

緄石見土其平可容考工車四軌建爲南北亭以經勞餞

又亭東山號曰重陽以醉風日南北經貫若出平郡無有

噫

闕二字

三年民恐卽去遮觀

闕二字

請留

闕二字

東山實在亭

下侯蔣氏名侑文曰

仁之爲道隆磊英傑天簡其勞羨以事物爲君之

闕二字蔣

是

闕一字

撮取不窮如武有庫蔣之有世以仁爲歸伯氏之

宜仲氏之思厥弟承之繩而不紃以令爲侯天子之德汝
侯爲理劔有盈昃君南臣北父坐子伏飲牛漚菅田訟以
直市正獄清謁歸告休朝雨滂沱濕其幘頭民樂以康願
有顯庸侯作南亭北亭是雙至於東山乃三其功摧險爲
夷大石是扛亦旣三年民走乞留伯氏南梁重弓二矛古
有魯衛惟我之曹惟仁之歸有世在下其攄其超尾馬鬣

馬惟蔣之融由唐龐叡惟是亭銘得其麤且唐大中八年九月一日太學博士河南李商隱撰

梓州道興觀碑銘

并序

總天下之事教分爲三處域中之大道居其一發軔於希夷之境解鞍於寥廓之場覽若士之遊九垓尚隘稽豎亥之步六合非遐徒欲洞視焦螟遙驅野馬折尺捶而求盡循白環而待窮則元籥猶嚴空筌尚滯輶推地盡莫知象帝之家蓋朽天穿未覩谷神之隧柔皮具紙折骨疎毫雖竭慮於九三終致迷於萬一洎飛龜藏義猛馬垂文貫王

屋之深珠方摧中冀封吳宮之合璧始會塗山變浩劫之
桑田注羣黎之耳目聞其大較未可殫論及夫祕篆抽竒
隱書詮奧摧藏鳥跡鬱勃龍光太上七言挾靈才之縹緲
元中九錫賁神物之便蕃則固可促軫求音援柯舉秀存
之則總橐籥於虛空遣之則喪輜重於修塗故泣辜痺坐
之君挺紀握圖之主何嘗不留連於太一惓悵於上元考
名都爲望幸之宮因爽塏爲集靈之地一言以蔽百代可
知梓州道興觀者五帝盤遊九仙卜築銅梁對軫還疑鑄
鼎之山錦浦均流未怯乘槎之水天彭割壤井絡分纏挺

夏后之靈妃滯震蒙之遊女乃知君王化鳥資是思歸力
士挽牛非將適遠往者大夫遺行著文自貶於巴歌中聞
協律設官作樂豈遺於渝舞照以火井潤之密房五色九
苞鎮飛神鳳三毛孫疑孔屢集文犀雖膏雨常霑使星時
入而君平至死不出靈關元彥平生未離嚴道亦中州之
藩服上古之名區昔隋室以綠字騰芳赤符宣慶尋思馬
湏悅閭苑之遐遊顧慕龍鱗羨喬山之僞葬爰依翠阜式
寫丹邱其始也漢苑澄泉華陰移土林中夸父卽貢宏材
橋畔秦皇仍分怪石取方中於絳闕摹大壯於元都臺實

九層觀惟一柱瑤房疊葺陽樹攢融俄以九縣告哀三靈
改物五芝八桂芻蕘者往焉四戶三階椎埋者至矣祝融
有醉回祿無厭始爇火以興端終樵煙而合氣五明之扇
將刼燒以爭飛十絕之幡逐崑燹而亂墜既灾巢馵亦斃
池魚悲哀欲甚於戊辰厭勝不聞於壬癸旅爲散地便接
蕪城田鼠誰燠封狼莫射梧雕碧甃光風聚失於孫枝草
沒彤闈浩露空溥於弟蔓我國家克將威命允富貞期李
出伊墟洪惟命氏檜生陳郡藹有昇仙誓牧野之辰則盤
古與天皇秉鉞入咸陽之後則尊盧與栗陸輦車納萬國

於堂皇攜九州於掌握彼獨夫之所廢俟明辟以攸興斯
觀復建蜺旌還張翠蓋不勞置臬而鷗閣飛來無待直繩
而虬堂化出三宮主籙八治威魔羅郁倘遊遽分條脫安
妃乍至或送交梨開元十七年太守張公重構石臺并投
火齊九枝散影二等分光且異金華送江南之夜讌寧同
蠟炬佐洛下之晨炊號爲殊庭多厯年所元和初妖興益
部釁稔坤維鍾會之窺覲劉璋之闇懦梁橫宋矢樓舞袁
轡將禾麥於親鄰欲邱樊於福地遂使嵇仄斷蒂董杏分
株瓊蘇入燃腹之間餽飯在抽腸之裏黃昏望斷不見青

牛昧旦神興唯逢白馬殆逾三紀闕校二官開成元年連
帥馮公擁蓋巴西揚麾左蜀永惟愛女名列通仙許長史
之全家皆推道氣茅東卿之繼世並有靈風乃夢寐假規
丹青往制旣分趙璧兼施魏珠擬聳闕於天台狀重樓於
句曲頓還舊觀且介通莊嗟乎歛駕方留化機潛迫削墨
則公翰復去飛梯則宋翟還歸或沙版仍虛或芝寮未豁
或菑菑闕垂於倒井或椒聊罕遍於周垣圖石室於西崑
猶資粉墨畫銀臺於東海尚渴鉛黃仙家寧有廢興人世
自多休戚今皇帝駢闐靈貺合沓真符爰顧寶臣來頒瑞

節尚書河東公華嵩衡霍麟鳳龜龍霈膏雨於豐年耀福星於分野加以融徽妙聞棲照元津書聖琴言論衡基品徵君虛幌未遠軍牙都講曲櫺更聯賓閣周柱史之論上士張河間所謂仙夫有猷而九牧具瞻無待而三元共獎女道士長樂馮行真廬江何真靖等並下元受事大洞刊名積雪通襟高霞映抱鍊氣則穀仙留訣迴顏則桂父陳方華岳洗頭豈肯秦臺吹管陽城掉臂安能魯殿窺窻永念洪紛每勤元貺義行於得衆事集於和光郡人焦太元等若干人卓鄭遙源嚴枚遠胄懸情紫簡稟化朱陵爭攜

莫逆之交共就列真之宇靈姿載穆景從多儀岳瀆奔趨
人天雜集十州倘見三島加昇氣轉金樞則雲歸鴛瓦漏
移銅史則星入鰕簾煥冰碧以交輝儼環玳而迭映縱時
更溟滓代變鴻濛於元黃未判之中存轆轤無垠之狀行
真等因標石闕來訪銀書予也五郡知名三河負氣顏延
年之縱誕未能斟酌當時王子敬之寒溫徒欲保全舊物
屬以魚車受寵璧馬從知子虛賦旣恨別時樂職詩空勞
動思况乎無仲祖之韶潤有彥輔之清羸髮短於孟嘉齒
危於許隱謝文學之官之日岐路東西陸平原壯室之年

交親零落方欲春臺寫望秋水凝情問句漏之丹砂餌華陽之白蜜惠而好我式契初心聊復攀逸軌以裁襟撫空懷而選義揚子雲譬詭之說蔡伯喈壻曰之言斯文倘繫於污隆後世何妨於知罪稽首歸命乃爲銘曰

道實彊名先天地生淵默未朕寂寥無聲中黃立極元陽降精隱軫金闕開華玉京

其一

於穆猶龍誕子靈族尼山設

問函關著錄開以九籀轉之一轂乃命雲孫納于大麓

其二

雲孫有慶開國於唐允文允武宜君宜王充庭疊瑞罄宇

儲祥連珠合璧氣紫雲黃

其三

大澤斬蛇新野得馬泗水亭

長邯鄲使者乾在地上豐照天下仁及隱微謙稱孤寡

其四

載釐五緯肆覲三尊虔恭眞質偃曝靈恩彌縫宇宙把握

乾坤邈迤邃宇參差妙門

其五

惟此左川西南奧壤古有經

始今存顯敞瑤林瓊樹銅林寶網玉女雲衣仙人露掌

其六

吳宮火燐熨道兵來聊於一氣示有三災壤因化往成由

運開太顛寶貝聲伯瓊瑰

其七

長樂肇端廬江纘美英蕤秀

萼旋綱步紀克蹈前武能新舊址媚此綺都鄰於錦里

其八

我之刊岳帝與令封青雲干呂白日高春道心結課天爵

疇庸沈研勝韻款至元蹤

其九

載念弱齡恭聞隱語蕙纓蘭

佩鴻儔鵠侶願騰華藻請事充舉如曰不然吾將誰與其

十

欽定全唐文卷七百八十目錄

李商隱 十

唐梓州慧義精舍南禪院四證堂碑銘 并序

道士胡君新井碣銘 并序

刑部尚書致仕贈尚書右僕射太原白公墓碑銘 并序

請盧尚書撰故處士姑臧李某誌文狀

請盧尚書撰曾祖妣誌文狀

請盧尚書撰李氏仲姊河東裴氏夫人誌文狀

李賀小傳

紀事

析微

爲滎陽公黃籙齋文

爲相公隴西公黃籙齋文

爲馬懿公郡夫人王氏黃籙齋文

爲馬懿公郡夫人王氏黃籙齋第二文

爲馬懿公郡夫人王氏黃籙齋第三文

爲故麟坊李尚書夫人王鍊師黃籙齋文

欽定全唐文卷七百八十

李商隱 十

唐梓州慧義精舍南禪院四證堂碑銘 并序

聖敬文思和武光孝皇帝陛下在宥七年尚書河東公作
四證堂於梓州慧義精舍之南禪院圖益州靜無相大師
保唐無住大師與洪州道一大師西堂知藏大師四真形
於屋壁化身作範南朝則閣號三休神足傳芳東蜀則堂
名四證乃今銓義與古求徒綵扎既新睟容伊穆爰命詞
客式揚道風蓋惟麾玉柄於元津初流二諦隱金椎於覺

路終駕一乘理在無言情殊有待慧間雲布誰爭潤礎之
功禪際河流匪競浮槎之遠旁詢地志遐考山經昆陵未
曰天齊泰岳徒稱曰觀定竺乾於身毒郭璞之言有徵證
羅衛於華胥王邵之書可信雖復一緣旣演五夢斯呈闐
寂雙林崩騰八國而心心授印寧關乾鵲之祥頂頂傳珠
未待驪龍之寐吾知之矣代有人焉惟無相大師表海遐
封辰韓顯族始其季味疑夙挺真機見金夫以有躬援寶
刀而敗面大師得因上行豁悟迷塗載驗土風東國素稱
君子旋觀沙界西方是有聖人遂西謁明師遇其堅卧俄

烘一指誓續千燈火鼠衣光燭龍引熖燿如燈蠟雪若煎
膏師乃引與之言歎未曾有退從谷隱惟製草衣曳屨用
自牧之蕙結束引難圖之蔓農夫乍去或議裁縫薙氏云
歸方聞襍積寧思天柱詎學水田鮮華不望於鬱泥密致
那期於刻貝加以峰危鳥道林絕人蹊梁置之鹽鄰殊莫
致鬱單之米界絕難通於是橡栗無求鳧茈不掘想餘糧
於蓬堞調美膳於苔垣吞沙了異於羅甸得塊返欣於重
耳昔平輿釋子猶餌石帆隴右沙門尚餐松葉比若斯等
方信莫同章仇兼瓊擁節內江分符右蜀因其百請始議

一來遇羯虜亂華鑿旌外狩局皇圖於巴濮指赤縣於犍
狔猱獠磨牙鯨鯢奮鬣上皇顯圖內禪自恃真期久披宸
襟徐叩妙鍵無慚漢室空禮清涼之臺有陋魏朝徒建須
彌之殿道舍九主恩浸四生獲永固於靈根實仰資於圓
智時無住大師尋休劍術早罷鈴經韜綦連之四弓捨步
陸之七箭逕欣道在罔憚人遐坎軻汾陰飄遙益部聿來
胥會默合元符本惟肅於尊顏竟克諧於妙果優孟之同
楚相不亦遼哉丑父之類齊侯竟何爲也事雖可引義則
殊歸宴坐窮岳化行奧壤頂輪降祉肉髻開祥及將寓信

衣乃誤因罷士經過九隧流落六羣彼旣懸定於傳刀此
亦熟驚於祛篋壁留曲阜詎爲張伯所藏劍出豐城豈是
雷華可佩適來適去悉見悉知故得大梵下從通僊右繞
臂舒百福眉曜千光靈禽例散於覺花瑞獸常銜於忍草
寧止山神且屈但送甘松藩后絕臨空分沈水凡茲異迹
未可殫論杜相國鴻漸崔僕射旰並望切龍門情殷荷擔
留迷待楫出病求攻克揚靜衆之名特峻保唐之號蜀誠
有矣楚亦宜然惟洪州道一大師古相標奇足文現異俯
愛河而利涉靡頓牛行過朽宅以銜悲頻迴象跡早從上

首畧動遐心攜仁壽之剃刀振天台之錫杖遡遠百濮直
出三巴拂衡岳以倘佯指曹溪而悵望都遺喻筏盡滅化
城罷懸柝於頓門抗前旌於超地披荆西裏坐樹南康有
感則通無聞不聳醫龜思遇哽虎求探化漢水之漁人奚
求往哲度青蘿之獵客肯愧前修智藏大師以松闕之英
梓潭之靈目廣青蓮脣飴赤果自有來而致敬由無取以
相歡綿邈星霜留連几杖初聞四句誠爲入實之賓末聽
三幡了是無師之智遽援坐席令傳了經非取履於下邳
還稱可教異服膺於泗水更謂不如明牧前歸英人後感

相紫階則生金吐義禮白塔則盡竹書名彼四大士者皆
行貫迦維名高記莚且夫紛綸藻繪列慈氏之雲臺合沓
細囊貯聖王之蓬閣我幕府河東公天瑞地寶甘雨卿雲
總海內之風流盛漳濱之模楷號鳴文苑陟降朝階自作
我上都統以京尹輦轂之下綏冕所興本之以強宗近親
因之以豪猾大俠丙吉爲相出遇橫屍袁盎免官歸逢刺
客公貞能盪盪正可辟邪殷貨殖於五都無勞走馬屏椎
埋於三輔何必問羊託宿於天官假道於雒宅五年夏以
梁山蟻聚充國鴟張命馬援以南征委鍾繇以西事大張

鄰援尋覆賊巢旣而軍壘無喧郡齋多暇紗爲管帽布是
孫余神仙中人方其攜手風塵外物乃以關身夢裏題詩
醉中裁簡臨池筆落動草琴休至於三堅八正之言四攝
六通之說則理超文外照在機先修竹長松不曾形迹孤
峰澹澗未覺親疎鄙物物以肇端自如如而取證讚同范
泰律若張融王澄徒服其嘉言孟顓不知其慧業屬者以
洪州三大師靈儀未集華構將成乃進牘求真移書抒意
江西廉使大夫汝南公黃中秉德業尚資仁動之則瑤瑟
瓊鐘鏘洋清廟靜之則明河亮月浩蕩華池遠應同聲函

緘遺貌試殿中監魯郡鄒從古家承作繪藝有傳神授以
齋修俾之雕煥情勞若病思苦如癡拂壁但見其塵驚倚
柱不知於雷震妙分塗掌巧寫應身如安所洗之腸若見
不沾之足詎同袁奮畫一室之維摩畧等戴逵寫五天之
羅漢况剎懸慧義山聳長平花市分區香城轉軫龕流迥
漢梯倚重霄桂處吳剛榆邊傳說轡迴義仲則日欲推輪
門啟蘇林則天堪倚杵斯堂也爰初置臬靡託金材或以
質簞參於焚燎如堪韜布恐劉肇以栽筒苟可當邁慮蔡
邕而製笛公遂養之宏棟易以榮椽黃楠可訪於下巢翠

篠罔攀於清渭漸鴻得桷賀鸞依梁望同老氏之春臺牢
若文翁之石室本乎初念逮彼成功自一毛半菽之微至
雕玉布金之麗皆不資官廩無取軍租非飲馬之餘錢則
遺盜之舊布將遣涪川習定鄴道降魔苟能浣爾之塵勞
莫不涉子之閭奧又院有緇叟族高隴西頃據方壇時稱
律虎晚修圓覺世謂義龍石磬朝吟銅瓶夜滿不扃外戶
靡立中園公喻以傳香假其譚柄且山毛綜覈未挂支提
許郭輩流偏遺梵行斯固天機有裕世網無纏盍褭緡於
縑緗可鋪舒於琬琰愚也中兵被召上士聯榮敢同譙郡

之功曹願作山陰之都講何言此事叨謂當仁矧紅磴時
尋多逢翠碣紫榛乍倚每見丹碑龍門慕新野之能江夏
服盈川之富恨不疆場俯接旗鼓親交貫其三屬之犀皮
焚彼十重之鹿角以靈才結課用逸思酬恩來者難誣前
言不戲庶使襍衡讀後重峻文科王粲背時更昇鄉品其
詞曰

熙矣無上怡然至真壽長滴海劫遠吹塵蒼茫去聖造次
求仁誰從多轍自涉殊榛婆斯南遊達摩東止智劍拭土
信珠澄水道在肝膽化行竹葦廬阜伸拳城安得隨猗歟

靜衆來隔天潯遺珪擲組燼指求心柔管代毳掏土延陰
鮮含檀鉢露澁瓊針鳴光天靈倉絲地望勢隔嚴道人同
寶相梵衆來格魔軍內向犀枕金爐冰崖雪嶂從容大寂
挺拔曹溪情超地位意小天倪呦呦苑鹿喔喔園雞融心
露鏡刮膜模範末有西堂克流英盼翦拂慧炬貫穿戒線
金浦涵月瓊嵒躍電雲母飄花流黃舉扇我公有命咨爾
丹青恢崇大厦寫載真形簷垂義網戶綴元烏三生聚石
九子垂鈴公實挺姿褰涵天壤捧日孤起橫秋直上謝安
塵尾王恭鶴氅灰琯迎和霜鐘進爽六通勝範四證微詮

蜂音出妙鳥偈留元傳真得果聚福成田遼遼鵬壑眇眇
龜年掩靄巴山繁華蜀國世界嚴靜人天膈臆崇基式固
芳音無數長現優曇永觀摩勒

道士胡君新井碣銘

并序

梓潼帥所治城東北一里有宮曰紫極宮宮有道士曰胡
君宗一東都佐漢尚書卽諫於探籌南國仕梁遊擊還聞
於奉鏡旣還閨紫府納陛丹臺遂擺落家聲而削除世系
今乃元元之遐胄玉皇之後昆青骨綠筋元邱白誌洞士
之鬚面處子之肌膚舌響瓊鐘骨搖金鑱霞烘帔薄籜嫩

冠歆開天上之文房應收筆硯入人間之武庫未見戈矛
其稟質之秀也如此青囊藥聖細展方神華陽之洞裏茯
苓湯谷之肆中甘草神憂智藏鬼謝秋夫以刮雲長者爲
凶以鍼孟德者爲忍郭太醫兩難之說無乃疎乎徐從事
九轉之方旣聞命矣其造微之術也又如此膺是美祿以
資元遊歎楚俗之醉稀怨中山之醒早歷城伏日會稽暮
春麴枕凌晨蓮簫落晚覆景升之伯雅倒季倫之接羅比
者解醒多調琬涎向來已渴例用瓊漿千鍾初戒於初筵
百榼未成於荒宴其寄情之遠也又如此不橫何筓靡對

朱杯崑崙之禾徒稱於商徼枕櫛之麴浪出於丹區朱鳥
含津蒼龍鍊氣用庖書爲外典以食蔬爲空言日彩九芒
便同業鼎露華五色已當僖盤其絕累之至也如此至於
直置形骸混齊歌笑或久留白社或暫詣丹麾遲迴而稍
至牆東倏忽而遷居竈北由來箕踞禰正平未曰狂生所
過冀除王彥伯齊稱道士則固非一端可定二教能拘諒
不測於仙階亦難論其鄉品然而能持慈寶不蠹元樞忽
聞濟物之功聊有寄言之路尚書河東公作鎮之三載也
兩苗均惠風草馳聲郗元帥之詩書那宜奪席曹相國之

黃老未足爭鞭君忽唱曰斯民也凡帶城闔畢趨宮井且
蠻沙易濫寶壤多疎不可家置銀牀人開玉甃其或跋烏
未上趙尊之戶扇方扃顧兔猶鳧曼倩之窗櫺未啟則詞
人卧病莫冀霑唇窮子號冤無容灑面况北通上路南際
殊鄰有渡漢之靈牛有還燕之駿馬少陽用事抱瑩角以
來思畏景無陰踰奔蹄而至止苟虧上善或致中乾君乃
於宮之西南載攷水經仍窮井德一八四八鮑侍郎遽爾
庾辭九二九三鄭司農藹然深義將就厥志必求所同時
則有若我同僚六君子者竇將軍之府內元甲朱旗王太

尉之幕中紅蓮綠水偕崇虛室並攝靈臺陰功共矢於三
千久眎同期於八百倒夫筐篋竭以抒機君乃指此甘涼
畢其溝沼烟移宋畚雷動劉鋹晉塊咸除涇泥盡漉靡踰
浹日遂冽寒泉復博采貞珉遐求怪璞混沌之鑿幾裂雲
根樸屬之車爭馳風磴武都引鏡東海分橋下壁立以呈
堅上觚稜而顯巧方流與潔靈沼分清丹竈飛華寧有代
僵之李赤簫遺響終無半死之桐隅落松門藩籬檜殿未
飛劫燼尚紐坤維武夷重讌於曾孫宣岳更歌於阿母亦
永絕無禽之咎終微射鮒之虞君更以我輩數人一時之

彥具惟方臭盍議雕刊疑余曾夢綵毫或吞文石屢迴隆

顧亟

字闕一

斯文八斗知慙四科奚取天長地久同銜瀉炎

之規古往今來無復結茆之困言之不足乃作銘云

光芒井絡鬱勃天彭於惟教父誕此仙鄉聞

闕一字

秦時見

臘嘉平黃寧虛位綠字題名

其一

徐瓠留犀扁桑分水號蹕

趙夢齊疔秦痔金繩續脉玉管損

疑

髓蛇膽明眸虎鬚牢

齒

其二

酖醢過市酩酊經墟潯陽傲令富渚狂奴三春竹葉

九日茱萸延年裸袒孟祖號呼

其三

龜咽存元熊經養秀曠

矣鼎鼐悠哉遵豆穢若食帶鄙同探轂竹實雖繁山梁不

興

其四

爰嗟繡井載隔寒林拜異疎勒穿殊漢陰膏融土脉

乳漢泉心匠得鳬舄上分鳳簪

其五

吾黨具采藩條是贊千

尋建木萬丈絕岸華裾上榻白析素案明月離雲鉤星在

漢

其六

燕齊賓客楊許師資養生著論招隱裁詩元中領悟

塵外襟期共防綆短同慮瓶羸

其七

古有三巴今分二蜀縈

紆九折崢嶸七曲元鶴華表仙人碁局我刻斯銘永嚶朝

旭

其八

刑部尚書致仕贈尚書右僕射太原白公墓碑銘

并序

公以致仕刑部尚書年七十五會昌六年八月薨東都贈
右僕射十一月遂葬龍門子景受大中三年自潁陽尉典
治集賢御書侍太夫人宏農郡君楊氏來京師胖胖兢兢
奉公之遺畏不克旣乃件右功世以命其客取文刻碑文
曰

公字樂天諱居易前進士避祖諱選書判拔萃注秘省校
書元年對憲宗詔策語切不得爲諫官補藍屋尉明年試
進士取故蕭遂州泝爲第一事畢帖集賢校理一月中詔
由右銀臺門入翰林院試文五篇明日以所試制加段佑

兵部尚書領涇州遂爲學士右拾遺滿將擬官請掾京兆
以助供養授戶曹時上受襄陽荊州入疏獻物在約束外
公密詆二帥且曰非善良後雖與宰相不厭禍其後禮官
竟以多殺不辜謚于頔爲厲李師古襲父事逆務作項領
以謾儕曹上錢六百萬贖文貞故第以與魏氏公又言文
貞第正堂用太宗殿材魏氏歲臘鋪席祭其先人今雖窮
後當有賢卽朝廷覆一瓦魏氏有分彼安肯入賊所贖第
耶上由是賜錢直券以居其孫在職三年每讌見多前笏
留上輦是否意詔滿剔扶摩望及少年見天下無一事五

年會憂掩坎廬墓七年以左贊善大夫著吉武相遇盜殊
絕賊棄刀天街日比午長安中盡知公以次紙爲疏言元
衡死狀不得報卽貶江州移忠州刺史穆宗用爲司門員
外四月知制誥加秩主客真守中書舍人敘緋受旨起田
孝公代衡陽孝公行贈錢五百萬拒不內燕趙相殺不已
公又上疏列言河朔畔岸復不報又貶杭州旣至築堤捍
江分殺水孔道用肥見田發故鄴侯泌五井亭儲甘清以
變飲食循錢塘上下民迎濤祠神伴侶歌舞徙右庶子出
蘇州授秘書監換服色遷刑部侍郎乞官分司得太子賓

客除河南尹復爲舊官進階開國九年除同州不上改太子少傅申百日假又二歲得所薨官白氏由楚入秦秦自不直杜郵事封子仲太原以有其後祖某鞏縣令考季庚襄州別駕贈太保一女妻譚氏始生公七月能展書指之無二字縱橫不誤旣長與弟行簡俱有名故李刑部建庾左丞敬休友最善家居以戶小飲薄酒朔望晦輒不肉食攜鄧同韋楚白服遊人間姓名過海流入雞林日南有文宇國爲中書舍人三日如建中詔書上鄭公覃自代後爲相質直文宗時文貞公果有孫起使下數歲至諫議大夫

賢可任爲今上御史中丞他日景受嘗跪曰大人居翰林
六同列五具爲相獨白氏亡有公笑曰汝少以待其曾祖
弟今右僕射平章事敏中果相天子復憲宗所欲得開七
關城守四州以集巨伐仲冬南至備宰相儀物擎跪齋栗
給事寡嫂永寧里中有兄弟家指嚮健慕以信公知人集
七十五卷元相爲序系曰

公之先世用談說聞肅代代優布蹤河南陰德未校公有
弟昆本枝不搖乃果敷舒匪髀匪臠噫其醇腴於鄉洎邦
取用不窮天子見之層陞玉堂徵徵其中上汰唐禹帝爲

輦留續緒襃縷歲終當遷戶曹是取煜白其華矚不痕縈
用從棄遣至道天子疇誰與伍率中道止納筆攝麾綽三
郡理旣去刑部條東其居大尹河南翦其暴逋君有三輔
臣有四畝臣衰君強謝不堪守翊翊伸伸君子之文不僭
不怒惟君子武君子旣貞兩有其矩孰永厥家曾祖之弟
坤柄巽繩以就大計匪哲則知亦有教詔益裒其收摭
而鐫刻詩於碑以報百世公老於東遂葬其地

請廬尚書撰故處士姑臧李某誌文狀

曾祖諱某皇美原令祖諱某皇安陽縣尉父諱某皇郊社

令處士諱某字某郊社令第二子也年十八能通五經始就鄉里賦會郊社違恙出大學還滎山就養二十餘歲乃丁家禍廬於壙側日月有制俛就變除遂誓終身不從祿仕時重表兄博陵崔公戎表姪新野庾公敬休平陽之郡等以中外欽風處在師友誘從時選皆堅拒之益通五經咸著別疏遺畧章句總會指歸韜光不耀旣成莫出麤以訓諸子弟不令傳於族姻故時人莫得而知也注撰之暇聯爲賦論歌詩合數百首莫不鼓吹經實根本化源味醇道正詞古義奧自弱冠至於夢奠未嘗一爲今體詩小學

通石鼓篆與鍾蔡八分正楷散隸咸造其妙然與人書疏
往復未嘗下筆悉皆口占惟曾爲郊社君造福於墅南書
佛經一通勒於貞石後摹寫稍盛且非本意遂以鹿車一
乘載至於香谷佛寺之中藏諸古篆衆經之內其晦跡隱
德率多此類長慶中來由淮海塗出徐州時有人謂徐帥
王侍中曰李某真處士也遂以賓禮延於逆旅願枉上介
與爲是邦處士謂徐帥曰從公非難但事人匪易長揖不
拜拂衣而歸其詞蓋譏其崔相國事也復歸榮上講道如
初享年四十有三以太和三年三月二十六日棄代以其

欽定全唐文

卷七百八十

李商隱

古

年十月卜葬於滎陽壇山原望於先域夫人滎陽鄭氏合
焉二男瑊瑒時甚幼孺猶子思晦寔尸其禮至會昌三年
以風水爲患松楸不立二子號咷願更著龜商隱與仲弟
羲叟再從弟宣岳等親授經典教爲文章生徒之中叨稱
達者引進之德胡寧忘諸願襄改卜之禮敢遺撰美之義
閣下獨執文律首冠明時瑒於篇翰之間惠以交遊之契
竊書遺事敢請刊銘冀推族類之恩用永隱淪之德伏紙
酸哽十不存一謹狀

請盧尚書撰曾祖妣誌文狀

故相州安陽縣姑臧
李公夫人范陽盧氏

北祖
大房

夫人姓盧氏曾祖諱某某官父諱某兵部侍郎東都留守
夫人兵部第三女年十七歸於安陽君諱某字叔洪姑臧
李成憲滎陽鄭欽說等十人皆僚壻也安陽君年十九一
舉中進士第與彭城劉長卿中山劉昫虛清河張楚金齊
名始命於安陽年二十九棄代祔葬於懷州雍店之東原
先大夫故美原令之左次美原諱某字旣濟其墓長樂賈
至爲之銘一子邢州錄事參軍諱某字叔卿始夫人旣孀
教邢州君以經業得祿寓居於滎陽不幸邢州君亦以疾

早世夫人忍晝夜之哭撫視孤孫家惟屢空不克以邢州
歸祔故卜葬於滎陽壇山之原上俾自我爲祖百世不遷
後十年夫人始以壽歿諸孤且幼亦未克以夫人之柩合
於安陽君懷鄭相望二百里而遠仍世多故塋兆尚離日
月遄移將逾百歲曾孫商隱以會昌二年由進士第判入
等授秘書省正字所以稱家尅謀啟合罪戾增積降罰於
天卜吉之初再丁凶釁永唯殘喘寄在朝夕懼泉阡乖隔
松檟摧殘銜哀救血盡力襄事尅以來年正月日啟夫人
之櫬歸合於懷之東原永瞻貽厥之恩詎忘論撰之義間

下我祖妣之族子今天下之文宗深惟託分之重實仰錫類之旨敢祈刊勒薦慰尊靈叩心獻狀辭不宣德謹狀

請盧尚書撰李氏仲姊河東裴氏夫人誌文狀

昔我先君姑臧公以讓弟受封故子孫代繼德禮蟬聯之盛著於史牒王考紉曹君以隱德不耀俛仰於州縣烈考殿中君以知命不撓從容於賓介惟我仲姊實漸清訓年十有八歸於河東裴允元故侍中耀卿之孫也旣歸逢病未克入廟實厯周歲奄歸下泉時先君子罷宰獲嘉將從他辟遂寓殯於獲嘉之東厥弟不天旋失所怙返葬之禮

闕然不修至會昌三年商隱受選天官正書秘閣將謀龜
兆用釋永恨會允元同謁又出宰獲嘉距仲姊之殂已三
十一年矣神符夙志卜有遠期而罪豐貫盈再丁艱故且
兼疾瘵遂改日時明年冬以潞寇憑陵擾我河內懼惟樊
發載軫肝心遂泣血告靈攝縗褻事卜以明年正月日歸
我祖考之次滎陽之壇山仲姊生稟至性幼挺柔範潛心
經史盡妙織紉鍾曹禮法劉謝文采顧此兼美自乎生知
而上天賦壽不及二紀此蓋羣弟不肖之所延累也銘表
之託本於文人將慰歸來之魂實在不刊之筆銜哀摧咽

五情已崩孤苦蒼天永痛蒼天

李賀小傳

京兆杜牧爲李長吉集序狀長吉之奇甚盡世傳之長吉姊嫁王氏者語長吉之事尤備長吉細瘦通眉長指不能苦吟疾書最先爲昌黎韓愈所知所與遊者王參元楊敬之權璩崔植爲密每旦日出與諸公遊未嘗得題然後爲詩如他人思量牽合以及程限爲意恒從小奚奴騎距驢背一古破錦囊遇有所得卽書投囊中及暮歸太夫人使婢受囊出之見所書多輒曰是兒要當嘔出心始已耳上

燈與食長吉從婢取書研墨疊紙足成之投他囊中非大
醉及弔喪日率如此過亦不復省王楊輩時復來探取寫
去長吉往往獨騎往還京雒所至或時有著隨棄之故沈
子明家所餘四卷而已長吉將死時忽畫見一緋衣人駕
赤蚪持一版書若太古篆或霹靂石文者云當召長吉長
吉了不能讀歛下榻叩頭言阿嬭

長吉學語時
呼太夫人云

老且病賀

不願去緋衣人笑曰帝成白玉樓立召君爲記天上差樂
不苦也長吉獨泣邊人盡見之少之長吉氣絕嘗所居窗
中勃勃有烟氣聞行車噐管之聲太夫人急止人哭待之

如炊五斗黍許時長吉竟死王氏婦非能造作謂長吉者
實所見如此嗚呼天蒼蒼而高也上果有帝耶帝果有苑
囿宮室觀閣之玩耶苟信然則天之高邈帝之尊嚴亦宜
有人物文彩愈此世者何獨番番於長吉而使其不壽耶
噫又豈世所謂才而奇者不獨地上少即天上亦不多耶
長吉生二十四年位不過奉禮太常中當世人亦多排擯
毀斥之又豈才而奇者帝獨重之而人反不重耶又豈人
見會勝帝耶

紀事

象江太守

滎陽鄭璠自象江得怪石六其三聳而銳上又一如世間
道士存思圖畫人肺胃肝腎次第懸絡者又一空中而隱
外若癭癰殃疝病不作物者又一色紺冰去聲而理平漫彈
之好聲璠爲象江三年不病瘴平安寢食及還長安無家
居婦兒寄止人舍下計輦六石道費俸六十萬璠嗜好有
意極類前輩人

華山尉

陶生有恒人善養又善與人遊又善爲官會昌時生病骨

熱且死是年長安中進士爲陶生誅者數十人生在時吾
已得之矣及旣死吾又得之

齊魯二生

程驤

右一人字蟠之其父少良本鄆盜人也晚更與其徒畜牝
馬草廩一私作弓矢刀仗學發冢抄道常就迴遠坑谷無
廬徼處依大林木蚤夜偵候作姦李師古貪諸土貨下令
卹商鄆與淮海競出入天下珍寶日月不絕少良致資以
萬數每旬時歸妻子輒置食飲勞其黨後少良老前所置

食有大嚮連骨以牙齒稍脫落不能食其妻輒起請黨中少年曰公子與此老父椎埋剽奪十數年竟不計天下有活人今其尚不能食況能在公子叔行

胡浪反

耶公子此去

必殺之草間毋爲鐵門外老捕盜所狙快少良默憚之出百餘萬謝其黨曰老嫗真解事敢以此爲諸君別眾許之與盟曰事後敗出約不相引少良由是以其資發舉買轉與鄰伍重信義卹死喪斷魚肉葱薺禮拜畫佛讀佛書不復出里閭竟若大君子能悔咎前惡者十五年死子驤率不知後一日有過其母罵之曰此種不良庸有好事耶驤

泣問其語母盡以少良時事告之驤號泣數日不食乃悉散其財踰年驤甚苦貧就里中舉貢給薪水灑掃之事讀書日數千言里先生賢之時與饘糗布帛使供養其母後漸通五經歷代史諸子雜家往往同學人去其師從驤講授又其爲人寬厚滋茂動靜有繩墨人不敢犯烏重允爲鄆帥喜聞驤與之錢數十萬令市書籍驤復以其餘資諸生其里閭故德少良者亦嘗來與驤孳息其貨數年復致萬金驤固不以爲已有繩契管捷雜付比近用度耗費了不勘詰道益高開成初相國彭城公遣其客張谷聘之驤

不起

劉義

右一人字義不知其所來在魏與焦濛閭冰田滂善任氣重義大軀有膂力常出入市井殺牛擊犬豕羅網鳥雀亦或時因酒殺人變姓名遁去會赦得出後流入齊魯始讀書能爲歌詩然恃其故時所爲輒不能俯仰貴人穿屐破衣從尋常人乞丐酒食爲活聞韓愈善接天下士步行歸之旣至賦冰柱雪車二詩一旦居廬仝孟郊之上樊宗師以文自任見義拜之後以爭語不能下諸公因持愈金數

斤去曰此諛墓中人所得耳不若與劉君爲壽愈不能止
復歸齊魯義之行固不在聖賢中庸之列然其能面道人
短長不畏卒禍及得其服義則又彌縫勸諫有若骨肉此
其過人無限

宜都內人

武后篡旣久頗放縱耽內習不敬宗廟四方日有叛逆防
豫不暇時宜都內人以唾壺進思有以諫者后坐帷下倚
檀机與語問四方事宜都內人曰大家知古女卑於男耶
后曰知內人曰古有女媧亦不正是天子佐伏羲理九州

耳後世孃姥有越出房間斷天下事者皆不得其正多是
輔昏主不然抱小兒獨大家革天姓改去釵釧襲服冠冕
符瑞日至大臣不敢動真天子也然今者內之弄臣狎人
朝夕進御者久未屏去妾疑此未當天意后曰何內人曰
女陰也男陽也陽尊而陰卑雖大家以陰事主天然宜體
取剛亢明烈以消羣陽陽消然後陰得志也今狎弄日至
處大家夫宮尊位其勢陰求陽也陽勝而陰亦微不可久
也大家始今日能屏去男妾獨立天下則陽之剛亢明烈
可有矣如是過萬萬歲男子益削女子益專妾之願在此

后雖不能盡用然卽日下令誅作明堂者

析微

斷非聖人事

堯去子舜亦去子周公去弟後世人以爲能斷此絕不知
聖人事者斷之爲義疑而後定者也聖人所行無疑又安
用斷聖人持天下以道民不得知聖人理天下以仁義民
不得知害去其身未仁也害去其家未仁也害去其國亦
未仁也害去其天下亦未仁也害去其後世然後仁也宜
而行之謂之義子不肖去子弟不順去弟家國天下後世

皆蒙利去害矣不去則反宜然而爲之堯舜周公未嘗疑又安用斷故曰斷非聖人事

讓非賢人事

世以爲能讓其國能讓其天下者爲賢此絕不知賢人事者能讓其國能讓其天下是不苟取者耳湯故時非無臣也然其卒佐湯有升陟之役鳴條之戰竟何人哉非伊尹不可也武故時非無臣也然其卒佐武有牧野之誓白旗之懸果何人哉非太公望不可也苟伊尹之讓汝鳩仲虺太公望之讓太顛閎夭則商周之命其集乎故伊尹之醜

夏復歸太公望之發揚蹈厲當此時雖百汝鳩百仲虺伊尹不讓也百太顛百閔夭太公望亦不讓也故曰讓非賢人事

爲滎陽公黃籙齋文

臣伏聞系自象先道尊元教有無名之璞不可雕鏤開衆妙之門未嘗關鍵達人大觀上士勤行始有胥連爰交尊陸皆稟混成之教以凝懸解之功及至化漸漓真元稍散七十神虎窮蹈籍之姿九百毒龍恣貪殘之患乃復吳宮合石王屋流珠方班萬國之朝始定百靈之位大之則籠

羅八極居蓆芥之微小之則陶冶一身後天地而老上維
皇屋下及蒸人莫不受煉朱陵施功鄴部故五臘二直八
節三元咸開懺拔之科用顯修崇之旨臣某幸生昭代素
稟元風每秋水凝情春臺寫望暢靈襟而抽思若振羽毛
動元籥以開懷如餐沆瀣因循官牒漸染君恩旣乖紫氣
之占遂阻丹邱之會五嶺之表再麾始臨撫凋瘵之民人
壓蠻髦之雜俗竊恐見聞所及未契元科舉措之間有踰
真裕或散爲疾癘或邁作凶饑敢薦真師式陳妙會况此
府水環湘桂山類蓬瀛固亦武陵之谿桃源接境平昌之

井荆水通津洞乳凝華岳煙結氣浮邱別館薊子邳亭豈
直發地五千獨稱於大華去天三百惟迷於武功實幸廉
車得親靈境今則涼飈已戒溽暑尋徂九外八遐靜無氛
翳二元三景藹有輝光雲篆鳥章珠巾琳几畧皆備物粲
有加儀伏乞太上三尊十方眾聖曲流元澤大降鴻慈先
俾清朝克逢多福南面慶千春之壽北辰康億載之歡三
事百官共綏天祿四夷萬有長叶帝謨然後所部封疆當
州寮屬皆無虛士屢有豐年臣齋功獲申道念增厚式揚
藩任妙選宸心慶靈長被於身枝清裕永霑於家屬則仰

荷大道無極之恩臣限以嚴局屬茲戎寄不獲躬齋素簡
親詣黃壇望紫府以馳誠向清都而潔慮謹附臣李道琮
墨辭上啟惶恐謹辭

爲相國隴西公黃籙齋文

臣忝系仙枝獲蒙道蔭早佩相印屢登齋壇雖八景三清
麤聞科戒而七情五賊未勉修持入輔出征綿時歷歲伏
慮政刑非當賞罰或乖積愆咎於元司負委寄於皇渥今
謹齋薄具仰獻微誠伏乞太上三尊十方眾聖曲垂保佑
大賜滌除俾善業克成良願無擁金柯玉葉奉聖祖於千

秋黃屋丹墀戴吾君於億載百蠻康樂萬國又安然後散
及冥塗霑諸鄴部寒靈罷對滯爽騰輝俱升仁壽之方共
奉太平之化

爲馬懿公郡夫人王氏黃籙齋文

唐某年月日朔上清大洞三境弟子妾某本命某年若干
歲某月日生屬北斗某星住河南府河南縣正平坊安國
觀內今謹攜私屬弟子某等詣京兆府萬年縣永崇坊龍
興觀內奉謁受上法師東岳先生鄧君奉依科儀於三聖
會仙堂內修建黃籙妙齋三日三夜轉經行道奉爲先受

法尊師並道場男女官眾及九元七祖弟子門徒等懺罪
拔苦祈恩辭上謁虛無元始自然天尊太上大道君太上
老君金闕後聖李君十方靈真三界官屬三十六部尊經
元中大法師天地水三官北斗尊神本命星尊神洞天林
谷一切棲隱諸靈仙等妾夙值師尊欽聞教旨伏以元皇
布氣時播羣生太一傳形肇流品庶皆陶無始成彼自然
及三古已還九皇秘迹羣妖眾孽黷亂真元鬼道尸邪干
迷至正於是大分治化廣闢章符金板玉繩載演修存之
術河源鄴部重明考治之科故得三靈無墊壞之虞萬物

被生成之德妾內惟幼騃晚遂修持爰在童蒙被諸僭咎
去元和某年獲託於故戶部尚書贈左僕射臣馬總極紛
華於少壯結胎血之因緣况臣總被沐君恩久居藩鎮受
專征之寄擅外間之權殄寇下城所傷者不記用刑持法
所坐者至多雖事上之心誠無顧避而奉行之際或爽重
輕故臣總平生之時許妾以虛無爲念冀因晚節同結良
緣及臣總捐家妾終喪紀婚姻靡畢門戶如初故東都某
觀道士南岳先生符君哀妾香火之勤成妾巾褐之願爰
從披度驟厯年光雖積穢行尸感通莫冀而三蟲六賊制

伏無虧流輩之中吹噓驟至謂可以奉三洞之尊法稽七
真之異聞勸請殷勤推許重疊妾雖榮從非望亦念切良
時遂於某年於某處奉詣大洞師東岳先生鄧君奉受上
法迴車畢道交帶紫紋負荷元科叨忝真位妾夙宵感勵
寢食慙惶於今五年益勤一志兼誓除俗累漸慕清修休
絕已來志念愈潔所希稍存真氣可降眾靈又按仙記云
師與弟子能相保七年法者當得道况今國家奉元元之
裔聖上崇清淨之風妾師奉爲君親廣存濟度妾又筋骸
非病齒髮未衰仰佩元恩實爲罔極是敢重投靈地再獻

微誠遂有同學男女官某嘉妾至心勉妾上路卽以今夕
再次仙都慶百生有幸之辰登三聖會真之室修崇始畢
朝禮云初何必銀臺遠居東海詎資瑤闕近到西昆窺觀
而羽翼疑生行列而雲霓交暎欣榮過極感泣不勝謹用
上按仙儀旁徵齋法特延清衆重請本師伏乞太上三尊
十方衆聖曲流元澤大降鴻私錄妾一念之清心赦妾億
劫之重罪伏願善緣益長丹懇獲申君王冀保於千齡輔
弼永綏於百福五穀豐稔四方乂寧先授道師遷洞天之
位今傳法主享龜鶴之年道俗二緣咸蒙覆露幽明兩代

並洗僊尤先魂無冢訟之辜同志絕干城之患陰幽滯爽
狴犴窮冤皆獲遷昇盡從寬釋妾誓持女弱永奉元微苟
負盟文冀當冥考妾某無任懇惻祈恩之至謹辭

爲馬懿公郡夫人王氏黃籙齋第二文

唐會昌三年太歲癸亥十月丙辰朔十五日庚午上清大
洞三境弟子中岳先生黃帝真人張抱元於所居宮內奉
依科儀修建下元黃籙妙齋兩日兩夜轉經行道懺罪乞
恩拜上諸虛無自然元始天尊太上大道君太上老君十
方眾聖三界靈官三十六部尊經元中大法師崇岳山諸

靈官等妾聞至極含虛真人在已陶混元於無始稟靈性
於自然莫不龐贅有爲粃糠非道標北門而高視泛虛舟
而不羈及夫淳化漸離真元稍秘於是教垂三洞文演九
辰地紀天元因斯立極北艷南霍自此分區猶以修崇之
旨未宏懺援之科尚昧故七神五藏降虛黃之上經三日
元時開青女之秘訣事踰元象道介希夷正一真人餘文
具在三天教主遺法斯存妾慶自多生時丁休運永惟女
弱早服師門佩秘籙於上清階眾真之高位雖限存性分
而事繫因緣丁寧湯谷之遊髣髴朱陵之會貪叨斯極負

荷不勝故八慶三元良時吉日莫不廣開龜座大闢龍山
耀銜燭於幽都稽歛駕於元路況所居觀宇乃肇於貴主
創自平時絳館清宮居惟帝女珠囊錦帙來自天家通仙
之象設可憑大國之慶靈無泯自開元厥後天步攸艱閭
苑融臺倒邁鬱攸之毒霓旌絳節咸罹竊發之災而斯觀
棟宇無虧圖書不蠹綵扎如舊靈文若新況鎮我神州正
當午位北瞻翔鳳自傾臣子之丹誠南眺鑿龍宛是神仙
之福地雖浮邱尚阻而佳氣遙通先皇帝重振元風今天
子廣明至道恬神姑射系志崆峒銀甕告存非假華山之

出珠胎展瑞不因赤水之遺平陽之絳鬣時來崑岳之白
環屢入故二京法眾四海名流咸得蔭藹天光晞霑睿澤
雲竈盡期於九轉靈階畢慕於三清高功臣抱元捧日降
精因星命氏骨鳴金鑠響振瓊鐘昔自綺紵遂辭祿仕倦
薊子之都尉厭東方之侍郎固已名列紫書位通丹岳調
三關而自適通九館以忘憂頃以台嶠名遊雲臺高邁清
溪萬仞丹桂八重爰以金慈忽聞至止故妾及男女官等
因下元大慶之日水官校籍之辰稽首求哀標心奉請願
攜清眾爲按元科將有望於感通冀必聞於御徹今則元

欽定全唐文

卷七百八十

李商隱

无

冥司候陰魄將圓魚鑰開簠鱗廚備味列炬而房名流電
燎鑪而館號明霞伏乞太上三尊十方眾聖曲垂鑒映大
降優恩使妾等齋功克成道分增益聖君萬壽良輔千秋
凡在生靈悉蒙休祐上通清漢下及幽淵長育咸絕於天
傷窮滯皆蒙於開釋又伏以山東逆豎代北饑戎負義背
恩興兵動眾亦願元惡面縛而歸罪羣校倒戈而顯忠汗
俗惟新迷塗復正溥天之下率土之濱永無草擾之虞長
保升平之福妾幽明兩代道俗二緣在位者長簡於帝心
求道者早升於仙籍誓盡軀命欽奉香燈苟違斯言分當

冥考

爲馬懿公郡夫人王氏黃籙齋第三文

妾以微生幸蒙嘉運得因師友奉佩符圖品在高真文參
上法而塵泥賤質肉血微軀未能絕迹人寰棲心物外永
懷真格有負元科然至於澡雪身心修勤香火五臘二直
八節三元誓以嚴持不敢怠志然恐舉措之際未合元機
過咎之來積於艱部年深月遠覺重責深罹寒靈考治之
科辱大道興隆之運夙夜自念冰炭交懷今謹因中元大
慶之辰地官校籙之日輒於靈地敢獻微誠伏乞太上三

尊十方眾聖曲流元澤大降慈恩錄一念之清心赦億劫
之重罪使元功克就良願大成君王長享於萬年臣庶咸
離於五苦上自雲鳥下及泉魚凡曰生靈皆蒙覆護然後
及於私室資彼幽魂見存名上於南宮過往神離於北部
河源滯爽狴狴幽冤咸乞蕩除俾從遷適卽仰荷大道罔
極之恩

爲故麟坊李尚書夫人王鍊師黃籙齋文

以妾某所佩圖籙先經遺墜今復尋獲乞恩歸罪據辭上
詣虛無自然元始天尊太上帝道君太上老君太上丈人

三十六部尊經元中大法師所佩籙中靈官將吏三界官屬一切靈化嵩洛名山眾真高隱妾運從往業慶及今生獲以愚蒙早佩經法而注念不謹修奉多違殃與時增善隨日削莫忘塵累備極艱虞兒息凋零孫姪孤藐一辭西雍久寓東周五遷家居十變年序昨者以所授寶籙盛以雕奩旣忘誨盜之資果有擔囊之酷遂使金科玉篆見辱於宵人神將靈官久凌於暴客尋求未獲披露無因分已名繫幽官位標黑籍萬劫永沈於狴犴九元同役於河源而罪重憂深誠專感達始聞尋索旋得蹤由爰以吉辰迎

歸靜曲修存香火拂拭塵埃瑤緘錯落以如新錦帙爛斑
而若舊永懷覺戾不敢遑安今輒請高真仰陳薄具負荆
泥首引劒投軀伏乞太上三尊十方眾聖曲流殊渥旁勅
元司錄其歸咎之誠許以自新之路使良緣漸固真路稍
通旣勤肉血之餘長奉靈仙之戒苟其重渝今誓猶涉初
心請候真科以從冥考